

PM bimbang kes baharu Covid-19 meningkat

UM - 16/9/2020
mls: 3

Oleh MAISARAH SHEIKH RAHIM

maisarah.rahim@mediamulia.com.my

PUTRAJAYA : Perdana Menteri, Tan Sri Muhyiddin Yassin melahirkan kebimbangannya berhubung peningkatan jumlah kes positif Covid-19 yang agak ketara sejak kebelakangan ini walaupun negara berjaya menangani penularan wabak itu dengan baik.

Beliau berkata, sepanjang tempoh 14 hari yang lalu, sebanyak 615 kes baharu telah dicatatkan dan peningkatan itu turut menyaksikan tiga daerah yang merekodkan 41 kes atau lebih terutama di Daerah Kota Setar di Kedah dan Tawau serta Lahad Datu di Sabah.

Menurut beliau, jumlah keseluruhan pelawat dari luar negara yang dikesan positif Covid-19 juga bagi tempoh sama adalah seramai 1,017 orang.

Buat masa ini, jelas Perdana Menteri, berdasarkan dapatan yang diperoleh oleh para penyelidik dari seluruh dunia dan aliran kes yang dilaporkan, pandemik Covid-19 dilihat masih menular secara aktif dan dijangka akan berterusan untuk suatu tempoh masa yang agak lama.

“Tidak terkecuali, Malaysia juga masih mengalami penularan aktif wabak ini. Kes hari-



MUHYIDDIN Yassin dalam perutusan khas semalam mengingatkan mereka yang terlibat dalam Pilihan Raya Negeri Sabah supaya mengikut SOP ditetapkan. - UTUSAN/SHIDDIQIIN ZON

an Covid-19 yang direkodkan adalah sekitar satu, dua dan adakalanya tiga digit tanpa pernah mencatatkan kes sifar. Ini memberikan gambaran bahawa rantaian jangkitan Covid-19 di Malaysia masih belum dapat diputuskan sepenuhnya.

“Justeru, saya ingin mengingatkan supaya terus berwaspada. Jangan leka. Peraturan-peraturan berkaitan kuarantin, mesti terus berdisiplin dan patuh kepada peraturan supaya kita dapat mengawal penularan wabak Covid-19.

“Kerajaan tidak teragak-agak untuk melaksanakan Perintah Kawalan Pergerakan Diperketatkan (Temco) di kawasan-kawasan yang mencatatkan kes-kes baharu Covid-19 yang tinggi,” katanya dalam perutusan khas Perdana Menteri, malam tadi.

Dalam pada itu, Perdana Menteri berkata, kerajaan tidak akan terburu-buru untuk membuka sempadan negara, malah kawalan sempadan akan terus diperketatkan termasuk meningkatkan usaha menghalang

kemasukan pendatang asing tanpa izin (PATTI).

Kata beliau, walaupun kawalan sempadan negara yang ketat menimbulkan sedikit kesukaran khususnya mereka yang mempunyai urusan di luar negara, tindakan tegas perlu diambil untuk melindungi rakyat dan negara daripada wabak yang mengancam nyawa itu.

Perdana Menteri turut mengingatkan dalam keadaan negeri Sabah sedang menghadapi Pilihan Raya Negeri (PRN), mereka yang berada di negeri itu perlu sentiasa mengamalkan norma-norma baharu dan petugas-petugas pilihan raya harus memastikan semua aktiviti kempen dijalankan mengikut prosedur operasi standard (SOP) yang ditetapkan.

“Saya ingin mengingatkan kita semua akan kesan sekiranya kes-kes Covid-19 meningkat dengan mendadak dan Perintah Kawalan Pergerakan (PKP) terpaksa dilaksanakan semula. Akibatnya tentulah amat buruk kepada kehidupan kita dan ekonomi negara.

“Justeru, saya berharap kita semua akan terus cekal, tabah dan berdisiplin dalam menghadapi penularan wabak COVID-19. Ingatkan diri kita supaya terus membudayakan amalan norma-norma baharu kehidupan,” katanya.